

成唯識論述記

成唯識論述記卷第二十八 論文卷四之六

唐京兆大慈恩寺沙門窺基撰

次下第五段合解第六第七二門。此總問言此幾所俱。後總答言。且與四種。故合爲文。

此意相應有幾心所。

此卽初問。

且與四種煩惱常俱。

下答之中。文分爲二。初解因相應。後辨果相應。辨因相應中分三。一解染俱。二釋餘俱。三解受俱。就釋染俱中復分爲二。初釋頌文。後辨廢立。釋頌文。

中文分爲三。初解總句。四煩惱常俱。次顯別句。列四煩惱。後解煩惱字。總舉頌中第五句答。

此中俱言。顯相應義。

釋頌俱言。顯非餘義。

謂從無始至未轉依。此意任運恆緣藏識。與四根本煩惱相應。

顯與四種相應位次。行相所由。相應五義。如第八識處。卽第三卷說。此初五字。且解俱字。及因解四非一法故。煩惱後解。

其四者何。

下列別名。釋次二句。問起列名。

謂我癡。我見。并我慢。我愛。是名四種。

舉頌第六第七句。答於中有二。初列頌名。後依列別釋。此以無明爲本。因先有故。先說無明。後三果。故後說餘三。諸論先陳其果。後說其因。以尤重故。我癡者。謂無明。愚於我相。迷無我理。故名我癡。我見者。謂我執於非法。妄計爲我。故名我見。

釋二種名。如論可解。其無明相。瑜伽第十及緣起經。對法第一第四。顯揚第一等解。并諸無明相攝。不共無明等。如下證中說。

我慢者。謂倨傲。恃所執我。令心高舉。故名我慢。我愛者。謂我貪於所執我。深生耽著。故名我愛。

釋此二名。亦如後卷。倨者。倚恃。傲者。傲憚。其我愛。如第十瑜伽對法第一第六顯揚第一等說。我慢。我見。並如大論五十五。五十八等說。

并表慢愛有見慢俱。遮餘部執無相應義。

自下第三解并等字。前頌中云。并我慢我愛。今解彼并字。謂頌并字。表慢愛二法與見俱起。愛與慢俱起。今此通言云。表慢愛有見慢俱。意遮薩婆多等無相應義。彼不許相應。各自力起。大乘相應。如

下當解。

此四常起擾濁內心。令外轉識恆成雜染。

自下卻解煩惱之名因。先列名及出體已。方釋煩惱。此文勢也。今解煩字。擾者亂。濁者渾。此四常起擾濁內心。非如所餘六識中惑。擾濁他人等。故體是不善。今內緣故。令外六轉識恆成雜染。雜染之言。通三性有漏。

有情由此生死淪迴。不能出離。故名煩惱。

有情由此四煩惱故。恆執我等生死淪迴。此中淪字。謂淪沒也。迴者轉也。如車輪迴。無有休息。淪沒

生死不能出離得聖道等。此解煩惱字。故名煩惱。
惱亂行者。煩藉身心故。

彼有十種。此何唯四。

自下第二廢立門也。於中有二。初廢立根本自類。
後自釋妨。根本煩惱有十。此中何故唯有四耶。

有我見故。餘見不生。無一心中有二慧故。

說無餘見。其文可解。行相別故。

如何此識要有我見。

此外人問。於五見中。何不起餘見。要起我見也。

二取邪見。但分別生。唯見所斷。此俱煩惱。唯是俱生。

修所斷故。

此中三見俱分別起唯見所斷。瑜伽五十八對法等皆作是說。此俱煩惱唯是俱生修道所斷。故不相應。何以知者。如下引文。金剛喻定方能斷故。對法第四云。任運起者修道斷故。

我所邊見依我見生。此相應見不依彼起。恆內執有我故。要有我見。

我所及邊見依我見後生。此識相應不依彼起。任運緣內相續而生。不假他後起。故不起我所及邊見也。其我所見何見所攝。此非我見。我見局故。薩

迦耶見攝以名通故。若爾何故不與我所邊見二種互相續生。以恆內執無有間斷。不容餘見互相續起。故論說言。恆內執我。又前二見通緣內外。此唯恆內執有我故。要有我見。而餘四見。非此相應。何故不起疑等。

由見審決疑無容起。愛著我故。瞋不得生。故此識俱煩惱唯四。

此中身見能審決故。疑行猶豫。故不相應。對法等云。疑都無所有。以此愛見順著我故。無憎背瞋。故此俱唯四行相不同。故要唯四也。無明等中迷事。

理者。唯是迷理相應。不共分別者。如下說。四種愛。以爲集諦。此何愛攝。七慢等分別。如別章抄。見慢愛三。如何俱起。

自下第二釋。自妨難。外小乘等諸異計問。見與二法。如何俱起。以此各許自力生故。

行相無違。俱起何失。

此論主答。以行相同對法第六五十五等。許相應故。

瑜伽論說。貪令心下。慢令心舉。寧不相違。

外人復曰。五十五說。貪令心下。慢令心舉。寧云行。

相互不相違。

分別俱生。外境內境所陵所恃。麤細有殊。故彼此文義無乖返。

此論主答。一分別俱生二種別故。謂五十五說分別。五十八說俱生。分別者。唯見斷。又未必唯見斷。卽修道中。強分別生。不相續者。亦是類故。分別起故。煩惱增猛。貪下慢舉。故二相違。俱生起者。微細相續。故得相應。二外境內境二義別故。若緣外境多分見斷。亦通修斷。貪染生愛。心必下之。此通見修。若於彼慢。卽不卑下。故設卑慢亦不許與貪相。

應故。若緣內身爲境。以自愛故。心不卑下。緣之起慢。以自高故。得二相應。五十五約外。五十八等約內。三所陵所恃。二境別故。謂若陵彼起慢之時。必不起愛。故二相違。若自恃起愛。心必高舉。或陵他故。故得相應。並通見修斷。四由麤細二行相殊。麤猛利者。說不相應。二麤行相相違返故。若細者可相應。此二行相不相違故。通見修斷有四義別。五更加之。或隨轉理門。說不相應。真實理門。說相應故。彼此二文不相違返。或復多分說不相應。據實說之。亦得相應。然凡簡略。先在徧行煩惱。便言先

問根本。根本既訖。更問所餘。

△自下第二段第七餘所相應門。於中有二。初問。後答。

此意心所唯有四耶。

此卽外人乘前起問。所以者何。此意因中恆時染汙。欲明惑本。先明前四。徧行五數。諸識定有別境等法。或隨有無。故在後問。

不爾。及餘觸等俱故。

答中有二。初舉頌答。後廣分別。此卽初也。不爾故三字。釋者加也。非唯有四。故言不爾。頌有餘字。遂

有諍生。下有二解餘字。卽爲二文。一謂四惑之餘。卽次第一解是。二謂觸等之餘。卽下四師解是。有義此意。心所唯九。前四及餘觸等五法。卽觸作意。受想與思。意與徧行。定相應故。

第一師中文勢有二。初釋本頌。後釋無餘心所。所以釋本頌中。初以二義解餘。後釋及字。此識總與九心所俱。前四及四之餘觸等五法。意與徧行。定相應故。五十五說諸識生時。與幾徧行心所俱起。答五。卽作意等。瑜伽第三云。通一切性處時。一切俱等。故證此文。言徧諸識。此則一解餘字。四惑之

餘也。次第二解。

前說觸等異熟識俱。恐謂同前亦是無覆。顯此異彼。故置餘言。

此第二解餘。恐謂此中觸等五法亦同於前異熟識俱者。亦是無覆無記性攝。顯此俱五性異於彼相應五性。故置餘言。問。若爾。何故次後復說是有覆性。答言。餘者爲異前性。不知何性。復言有覆。分別自體爲簡彼前性。故置餘言。問。餘字既然。及字何用。

及是集義。前四後五合與末那恆相應故。

及是相違義顯諸心所體各不同。又及者等義舉
四煩惱等餘觸等。然今此師但以合集而釋及言。
前四煩惱後五徧行。合此九法。此識相應顯非唯
一法。與此相應故。合集九法與此俱也。故置及言。
令知有九。上來第一釋本頌訖。

△次釋無餘心所相應爲欲了知更須發問。
此意何故無餘心所。

此外人問徧行許有其別境等何義故無一一應
答。初答別境次答善所。次答隨惑後答不定。

謂欲希望未遂合事。此識任運緣遂合境無所希望。

故無有欲。

欲緣從來未合事故。此恆緣合境。常是我故。若憶過未而起希望。已合卽念未合卽欲。五十五說於所愛事有欲生故。若爾諸佛應無有欲。無未合事故。今說非佛言未遂合。非說於佛有未合事故。不相違。下諸心所皆準此釋。又欲但觀所樂事轉。所樂之事名未遂合。故此無欲文與前別。與第八識所簡乃同。

勝解印持曾未定境。此識無始恆緣定事。經所印持。故無勝解。

勝解。但能印前疑事。不了事生。此恆決定計我非
餘。非先有疑。及會未了。今方印可。故無勝解。此約
因位。非佛行相。五十五說。於今決定勝解生故。
念唯記憶會所習事。此識恆緣現所受境。無所記憶
故。無有念。

念能憶昔會所習事。會於現在。習者已滅。今起追
憶。非我已滅。今生追憶。境恆有故。五十五說。於串
習事。念方生故。

定唯繫心專注一境。此識任運剎那別緣。既不專一。
故無有定。

定唯別作意繫心專一境。由加行心趣求一境。唯緣本質一法。不作別緣前後念解。亦非常解。此識任運不深趣求專緣一法。刹那別緣。故無定也。五十五說。於所觀事其定方生。任運緣者。卽無此定。旣爾如來便應無定。任運緣故。此難不然。如來識等深取所緣。非如七八。任運麤淺隨業等境。又佛識等因定類生。設令能緣其必有定。非七八識前時有定。種類引生專緣一境。而不定也。又佛專心。此散漫故。

慧卽我見。故不別說。

慧與我見非二並故五十五說見世俗有卽慧分故。餘別有性問。慧緣觀察事。此識言慧俱定緣觀察事。此俱應有定。答。任運亦推度。此識說慧俱深專一境有定生。此俱故無定。問。二緣觀察事。任運慧得生。任運旣無定。應不緣觀察。答。定境加行。必慧緣定。得緣觀察。有慧之境。定不定。故。此識俱無有定。雖同緣觀察。而慧寬定狹。故此無定。善是淨故。非此識俱。

第二簡善。其善十一。體非染故。非與此俱。此俱唯染故。自下第三。何故無隨惑。根本前已說。

隨煩惱生必依煩惱前後分位差別建立。此識恆與四煩惱俱。前後一類分位無別。故此識俱無隨煩惱。煩惱分位前後差別建立。隨惑離根本無別體。故不得並生。或無慚無愧不信懈怠。論雖說實。然是根本轉變分位。如所造觸。非如長等諸形色等。雖說有體。自不能與他根本俱。隨根本後起。又且如瞋輕微者名瞋。餘名忿等。如長等色。卽於彼假。故忿等二十不與根本俱生。此識恆與四根本俱。前後無始一類分位無差別。故此俱無隨惑。此師意說隨惑皆離根本無體。故對法云。忿等皆假。

此識一向非隨惑俱言餘染心說俱義者約第六識及五識說非謂此識無分位別故三文別者約別義說通不善有覆心中名徧染心非但是染心彼皆能起不定四中。

惡作追悔先所造業此識任運恆緣現境非悔先業故無惡作。

其文可解。

睡眠必依身心重昧外眾緣力有時暫起此識無始一類內執不假外緣故彼非有。

睡眠若起必依身心沉重惛昧此是內緣外眾緣

力卽是病等。或涼風等。有時暫起。如對法論第一
末說。卽是間斷。非相續義。惡作雖亦然。而約義別
說。此第七識。所藉緣少。無始一類。簡別不假內緣
而起。又言內執不假外緣而起。簡別外緣。由此緣
故。無睡眠也。

尋伺俱依外門而轉。淺深推度。麤細發言。此識唯依
內門而轉。一類執我。故非彼俱。

尋伺二法。並依外門緣外境生故。此二多依身語
門轉。故尋則淺推。伺則深度。尋則麤發言。伺則細
發語。此識唯依內門緣內我生故。一類執我。無淺

深推度。麤細發言。故不與彼俱。故此識俱唯有九法。或此師之意。其隨煩惱不徧根本。特越常倫。且如惛沉等。五染心若無。卽非染心。論有誠說。遂言說彼六識中徧徧行說通諸識。七八應無解云不然。徧行徧七八。諸論說七八。五染徧染心何處言徧七。若爾。五染言徧染。六識中皆有。六識起根本。應知五亦無。汝言徧六染心徧何位地。說之爲徧。故知後說於義爲勝。只如五徧染心無此不成染。六染中文無五中惛沉等何妨。論言五徧染。七識中無。卽是六識中除根本餘一切染。此五皆有。無。

則不成染。若互有無。如下自解。若作此釋。前解爲勝。

有義彼釋餘義非理。頌別說此有覆攝故。又闕意俱隨煩惱故。煩惱必與隨煩惱俱。故此餘言顯隨煩惱。下第二師重釋餘字。初總解。後別諍。此卽總釋頌中餘字。義實不然。何以知者。頌說此五有覆攝故。卽知餘字不簡前性。若言餘字簡前性者。此言有覆明自體。明白體時足簡前故。何須別簡。此破前師第二解也。汝第一解言卽四之餘。謂觸等五。若頌但言及觸等俱。誰不知觸等是四之餘。更說餘

字故知但是觸等餘也。若不爾者。闕此意俱隨煩惱故。何以知者。返覆徵難。理無逃處。故知餘字。自隨煩惱。何以如此。煩惱必與隨煩惱俱。故此餘言。定顯隨煩惱。自下別諍有四師說。今此第一。諸師共同。下有別者。一一廣解。第一因釋諸論相違。就此解餘是觸等餘中。總有四說。

此中有義五隨煩惱。徧與一切染心相應。

文意有二。初汎出徧染。隨後解此識俱。初中有四。一標宗。二引證。三立理。四會違。此卽初也。

如集論說。惛沉掉舉不信懈怠放逸。於一切染汙品。

中恆共相應。

此引證也。五隨徧與諸染心俱。何以知者。對法第六說。謂惛沉掉舉。乃至恆共相應。是集論第三卷文。

若離無堪任性等染汙性成。無是處故。

下立理也。是雜集論文。與此同也。謂離惛沉等。則不成染。惛沉是無堪任等。取餘四。何以知者。對法第一云。惛沉者。無堪任爲性。掉舉者。不寂靜爲性。不信者。不忍等爲性。懈怠者。心不策勵爲性。放逸者。不防有漏爲性。故也。若離無堪任染性不成。故

煩惱起時。心既染汙。故染心位。必有彼五。

煩惱起位。心稱染汙。故染心位。定有彼五。有何所以。

煩惱若起。必由無堪任。驚動不信懈怠放逸故。

諸煩惱起。必由無堪任。卽惛沉也。驚動是掉舉。餘三可知。無起煩惱。無無堪任性。及非驚動者故。問。如定變化障。硬澁。無堪任。卽通三性法。善中豈有惛沉性耶。答。由第七有。故餘成無堪任。如有漏善。非是善中有惛沉故。此五必徧一切染心。不爾。卽非是染心故。問。不信懈怠惛沉可然。或體實有。或

是假有。或通諸惑一分。或是愚癡分。此中掉舉。既是貪分。如何瞋時有。而言通染心。此師解云。
掉舉雖徧一切染心。而貪位增。但說貪分。

下會違也。有二段文。初會掉貪分。後會六十徧。此等初也。一切染心。卽瞋起時。而亦定有掉舉自性。而貪起位。卽掉舉增多。順貪故而實有體。故徧染心。五十三說是假有者。必無別體。是實有者。卽有別體。世俗有者。或別有者。或別無體。如下自解。此世俗有。故是實有。此中所辯實有體等。或文外意。諸論多約依貪上立。故言貪分。世俗有中。尅實出。

體卽別有也。爲會此文徧染心起舉如何等。

如眠與悔雖徧三性心而癡位增但說爲癡分。

其惡作者此中名悔雖徧三性心起體是實有而於癡起位相增但說此二以爲癡分。若眠悔無體是愚癡分卽善無記心此應非有不爾愚癡應通善心有。五十五云惡作睡眠是世俗有是愚癡分。對法論等言徧三性故別有體不可在善無記之中卽言有體染汙之中卽言無體而彼但言尋伺假故今例掉舉何義不同問。若以此五文爲正者何故瑜伽五十五說六法徧染五十八說十徧染

心。

雖餘處說有隨煩惱。或六。或十。徧諸染心。而彼俱依別義說徧。非彼實徧一切染心。

下會六十徧。諸論雖爾。而彼二文俱依別義說之。爲徧。非實徧也。六依何義。

謂依二十隨煩惱中。解通麤細。無記不善。通障定慧。相顯說六。

依二十種。不取別境染。分爲體。妄念散亂。不正知。三是癡分故。說二十二。卽取別境染分。說此三。及欲解。皆彼少分故。今言二十者。簡欲勝解二法。及

不定四。瑜伽此四說名隨煩惱。今約二十說。故簡別之。隨煩惱者。簡去於前根本十法。彼亦名隨。不說根本。名爲徧故。解通麤細者。顯此行相通麤細位。簡前忿等十法。彼解唯麤故。無記不善者。顯通二性。簡無慚無愧二法。彼亦通麤細解。然唯不善通障定慧相顯者。顯此六法障定及慧二俱相顯。簡惛沉掉舉二法。對法第一說。惛沉障毘鉢舍那。掉舉障奢摩他。瑜伽等說。惛沉障定。掉舉障慧。別障定慧。非俱通障。對法論中。說彼行相相翻障故。惛沉障慧。瑜伽說。彼行相相順障。說惛沉障定。掉

舉亦爾。翻此應知。然無一文。行相相翻。相順說。惛掉二法。麤相通。障定之與慧。故以通障定慧相顯。簡惛掉二。然約其體細得通障。今說行相相順相翻。二俱麤障。彼即不爾。其不信。懈怠放逸。忘念散亂。惡慧於染位中。徧此三義。故言徧也。一解通麤細。二通二性。三通障定慧。二十隨惑之言。雖復簡他。非所徧義。卽此六法。皆能徧故。名徧染心。非一切染者。六皆能徧。十隨惑者。放逸掉舉。惛沉不信。懈怠邪欲。邪勝解。邪念散亂。不正知。取五別境。染分爲隨。成二十二。已知說六十徧者何。

依二十二隨煩惱中解通麤細二性說十。故此彼說非互相違。

解十徧文。二十二者邪欲勝解明攝在中。亦簡不定。隨簡根本。解通麤細簡忿等十。二性簡別無慚無愧。通後二義言通。說十非所餘法。二十二等雖簡他法。非所徧義。故論三文亦無違理。

然此意俱心所十五。謂前九法五隨煩惱并別境慧。下解此識俱中初顯有。後辯無。此顯有也。此有十五。前九五隨別境中慧。以是見故得成十五。問。豈二慧得俱也。

我見雖是別境慧攝。而五十一心所法中義有差別。故開爲二。

我見卽是別境所攝五十一心所中義別說爲二。一慧是別境通三性九地故。二見唯染汙通九地等故。既有寬狹。別說不同。故開爲二。如不以見卽慧體。故別說見。今亦不以慧卽見。故別說慧也。何緣此意無餘心所。

下顯無也。雖知更加五隨煩惱與此俱起。不知何緣無餘心所。

謂忿等十行相麤動。此識審細。故非彼俱。

且從染答。前根本中無餘六者。五師皆同。下不別說。又上已說無有根本。諸師同故。此論但明五十一心所。故不明邪欲及邪勝解。且二十隨念等初十。皆解唯麤。此識審細。故無彼十。

無慚無愧。唯是不善。此無記故。非彼相應。

彼唯不善。此有覆故。

散亂令心馳流外境。此恆內執一類境生。不外馳流。故彼非有。

散亂若別有體。無體令心馳流外境上轉緣外方起。此緣內審。故無散亂。此師意存別有體也。下論

說言若別境中定爲體者是假不徧。餘者說徧。然今此師設別有體。以緣外起。或間斷故。不徧一切染。此識中無一恆故。二內執故。三一類境生故。不外馳流。故無散亂。

不正知者。謂起外門身語意行違越軌則。此唯內執。故非彼俱。

此數設是別境慧分。或是癡分。多起外門身語意業。緣外染汙三種業生。違越軌則。三界皆然。並越善故名違軌則。彼緣外生。此唯緣內。故彼無也。亦非是徧緣內無故。且如二十二隨煩惱中忿等十

四如文說無別境五法及隨惑中忘念邪欲邪勝解三何故此中不說隨三亦非徧也。答隨中三卽是別境之中三分故此不說。
無餘心所義如前說。

此例與上第一師同若遠例於上第八識同故不別說根本四惑如前共說然忘念一縱是癡分以其行相與別境中念分無別故不說有。不正知設慧分亦是癡分散亂別體者與定慧行相別恐謂亦俱故今別說又以不正知行相增強既許有慧恐亦許有故爲簡之忘念邪欲邪解由前理故亦

非徧數別境少分故此不說。

有義應說六隨煩惱徧與一切染心相應。

文亦有二。初出徧隨。後此識俱。初中有四。並準於前。此標宗也。立彼六種隨惑徧諸染心。何以知者。瑜伽論說不信懈怠放逸忘念散亂惡慧一切染心皆相應故。

下引證也。五十五說不信等至皆相應故名有六也。此師意說一切染心此之六種皆相應故不信懈怠放逸三種行相不違。如前師說實徧染心忘念等三。前來未解。故今應釋。

忘念散亂惡慧若無心必不能起諸煩惱

下立理也忘念散亂惡慧三法若無心必不能起諸煩惱無此三故如善心等以忘念慧是癡等攝散亂別有故徧染心如何要有忘念等三

要緣曾受境界種類發起忘念及邪簡擇方起貪等諸煩惱故

起諸煩惱者要緣先時曾受之境諸已得者或雖未曾受是曾受之境種類發起忘念及邪簡擇故有忘念及不正知失正念故邪簡擇故起染汙心如緣滅道起邪見等或聞未來有殊勝樂如天上

樂等。皆先聞名而起邪見。及貪等。故無始會得之境界也。或撥無滅諦等。撥先會受所聞之境種類名故。非撥彼體。親不證故。但親撥無彼類名故。如他界緣惑。皆緣名生。緣自心相。故染心時定有此二。問曰。染心皆有慧。五識應有執。以有慧故。答曰。五識定無深推求故。雖有不正知。無五見中我見。故無執也。法我人我皆我見故。又此癡分。故徧染心。又緣於內。如何起散亂。誰謂不起。如何名散亂。煩惱起時。心必流蕩。皆由於境起散亂故。

煩惱起時。心必馳流於境縱蕩。非如善位。此何爲

也。皆由於境起散亂故。方流蕩也。諸論解散亂。皆言不寂。不寂者。流蕩之義。與此理同。故此三法。徧諸染心。無無此三而成染者。何故。無惛沉掉舉二法。

惛沉掉舉。行相互違。非諸染心皆能徧起。

下會違也。釋無惛沉掉舉。所以行相相違。起一無一。非諸染心皆能徧起。掉舉外相高生。沉惛內相下起。若爾。何故對法等說五爲徧也。

論說五法徧染心者。解通麤細違唯善法。純隨煩惱通二性故。

彼論言徧徧於四義。一者通麤細。簡忿等十唯麤。事故二者唯違善法。卽明不信翻信。懈怠翻精進。惛沉翻輕安。掉舉返捨。放逸翻不放逸來。卽簡散亂從定數來。設別有體。所障之定。通三性故。不唯違善。忘念惡慧邪欲勝解。隨彼所翻。理亦應然。並翻別境之數來故。三者純隨煩惱者。簡根本惑及不定四。彼亦通名隨煩惱故。貪等唯違善中無貪等。然非純隨。故今簡也。四通二性者。簡無慚愧。由斯四義。故對法說五徧染心。非但染心卽皆有也。何義說十。

說十徧言義如前說

如初家說徧二義故

然此意俱心所十九謂前九法六隨煩惱并念定慧及加惛沉。

下此識俱申正義也。初顯有後辨無此相應法心所十九前九六隨如文可解并別境中念定慧三及加惛沉。

此別說念準前慧釋。

此別說念如次前師說慧所以卽我見故。此中忘念卽念數故。此不正知亦卽慧故。義說爲二。邪簡

擇故名爲惡慧。執我故名我見。或是癡分卽非我見。或可義別說之爲二。能發惡業者是第六識五識中語。非約第七故。此識俱有不正知。如前慧說。更不簡之。

并有定者。專注一類。所執我境。曾不捨故。

何意有定。專注一類。所執我境。不暫捨故。如於忘念緣會受境。此緣一物。故有定也。不同前師。彼無念故。緣新新現境。故亦無定。此中有之所存別故。加惛沉者。謂此識俱無明尤重。心惛沉故。無明重故。內迷執故。不外追故。故有惛沉。

無掉舉者。此相違故。

下顯無也。此與惛沉性相違故。不可雙起。

無餘心所。如上應知。

無別境欲及勝解二。及染汙中邪欲勝解忿等前十二。并不定四。如前第一第二師說。互有無者。此略說之餘。如上說。應可知也。

有義復說。十隨煩惱。徧與一切染心相應。

此第三師說。有十徧文段。準前。此標宗也。

瑜伽論說。放逸掉舉。惛沉不信。懈怠邪欲。邪勝解。邪念散亂。不正知。此十一。一切染汙心起。通一切處。三界。

繫故。

下引證也。五十八卷說有惛掉不信懈怠放逸五種。卽同初師有忘念惡慧散亂三種。同第二說加欲勝解故偏簡也。

若無邪欲邪勝解時。心必不能起諸煩惱。

下立理也。若無邪欲勝解。必不起煩惱。此卽總言染心有也。有何所以。

於所受境。要樂合離。卽持事相。方起貪等諸煩惱故。不問何世。有爲無爲。法順己者。要樂合故。法違己者。要樂離故。先或起貪。後或起恚。若是不愛不憎。

之境有處中欲卽是不合不離之欲此中所攝又
未有於境不樂合離起煩惱者邪見緣滅必是離
欲戒見取等卽是合欲若於境界不樂合離及不
印持卽無煩惱無煩惱時可無邪欲及邪勝解由
此二種非徧行故故染汙心要定有欲於所受境
要必印持印持事相無染心起不印持者既要欲
樂及印持故方起貪等是故此二染心非無卽證
十有餘證有如前說問如疑諦理等豈有印持耶
諸疑理者於色等事必無猶豫故疑相應亦有勝解
下會違也諸疑理者此念之時於苦等事必無猶

豫卽一心緣事理二境於理可疑於事必印。無有獨緣理不於事印。故如薩婆多十徧行中勝解疑心如何俱耶。卽此理證彼宗說是徧行故。今者大乘於事生疑。此念決定。除此疑事不於餘境生決印。故勝解之數非徧行攝。於理疑是煩惱。於事中必印持。謂此苦事生其印可。苦理有無方生疑故。故疑相應定有勝解。問印是定疑不定。相違得俱起。見是決疑不決。相返得俱生。答疑時解用劣。相返得俱生。疑見行俱增。相違不並起。問事決理猶豫。疑解二俱生。事決不生疑。所緣應不一。如何得

說同一所緣。答據二行相增事。決無疑相。論其體同。取理疑亦解。生問。若於理疑。必於事印。若於事疑。則無所印。此疑相應。便無邪解。邪解之法。不徧染也。

於所緣事亦猶豫者。非煩惱疑。如疑人机。

若於事中獨生疑者。此是苦事。此非苦事。不迷理生疑者。此非煩惱。如疑於机。爲人非人。是異熟生。無記心攝。非染汙心。若是染心。必有邪欲。故此心中無邪勝解。勝解非是徧行法故。問。耽染名貪。理事俱貪。猶豫名疑。理事俱疑。答此不然。疑行猛利。

於事名疑。貪行相通。境該理事。問於理生猶豫。事中卽決定。於事生猶豫。理中決定耶。答。理是事之理。疑理事必定。問。亦可。事是理之事。疑事理必定。答。事可現知。理難曉。若於理疑。事必印。非迷於事。理可知。故迷事時。理不印。如迷人時。必迷法。自有迷法。不迷人。不可迷人。必迷法。便令迷法定。迷人。瑜伽五十八等說。疑於五事。謂他世等者。此約事於理疑。非但迷世緣。他事時亦迷彼理。非不迷彼理。但迷他世事。若此迷時。一心於現事。必生印可。故問。欲解徧染心。論文何不說。

餘處不說此二徧者緣非愛事疑相應心邪欲勝解非麤顯故。

餘論不說此二徧者由此二體雖徧染心若緣非愛事情則不欲此事疑於理時不印於理於此二境欲及勝解相非麤故體細是有相非顯著不說者約麤顯論體實是有顯此二時卽無欲解不說爲徧此據有體所以言徧。

餘互有無義如前說。

五中無餘忘念等三如說六之家會其五也說六之中無沉掉二如說五家會六說也餘互有無故

如前說。

此意心所有二十四。謂前九法。十隨煩惱。加別境五。準前理釋。

下解識俱。初顯有也。有二十四。謂前九法。十隨煩惱。加別境五。準前理釋。五十三心所。各各別說。故攝慧等。

無餘心所。如上應知。

下辨無也。說此相應。無善十一。不定中四。根本六。惑。忿等諸隨。如上準說。

有義前說。皆未盡理。

護法菩薩爲第四說於中有三。初總非。次申理。後總結。此初也。

且疑他世爲有爲無。於彼有何欲勝解相。

下申理。申理中有二。初顯徧隨後。此識俱。初中有二。初破前後顯徧。此破前說。且難第三十徧家云。汝言於理生疑。必帶事印。如五十八等說。疑由五相。謂於他世作用因果諸諦寶中心懷猶豫。卽於事生疑。亦是煩惱。汝何故言於事疑非煩惱。旣於事疑是疑惑者。如何有欲勝解二數。若謂彼言於他世疑。必於現在而生印可。未來世中而生希望。

爲無或有。故於現在爲罪爲福。有差別故。於疑他
世中亦迷彼理。非不迷理而唯迷事。故於現印亦
有勝解者。難言疑未來爲無。此應有我見。我見是
推求。疑推求時無我見。印持是決定。疑時無勝解。
又於他世等疑。一心有勝解。疑机爲人時。此心應
有解。若爾許者。應是徧行。若此疑心相違。故無者。
彼疑理心如何得有。亦相違故。其尋伺相違。貪瞋
相返等。皆應難之。二云。然於去來若事。若理。生猶
豫者。心不緣現在。但緣去來於何生印。於釋種涅槃
中生猶豫者。有何印相。故知欲解不徧染心。此

亦去來理事雙疑。前解但緣事疑。以疑理所引。亦見道斷不可難言。緣事起故。非見道斷。行相迷理緣事故。如見取等。此行相深不同疑机。彼行相淺。非是煩惱。此破第三師十徧義。若爾何故說十俱耶。如初師解。

煩惱起位。若無惛沉。應不定有無堪任性。

次破第二六徧師義。起煩惱時。若無惛沉。此染汙心。應不定有無堪任性。若有堪任。便是善性。非染心。攝名堪任故。如善心性。染心若有無堪任性。異於善者。有惛沉故。對法等云。惛沉性者。無堪任性。

又云離無堪任染性不成。是故惛沉定徧染起。故起掉時。既是染心惛沉定有。

掉舉若無應無囂動。便如善等。非染汙位。

又染心位。掉舉若無應無囂動。囂動者。擾惱義。囂謂誼囂舉也。動謂搽動掉也。染心既是囂動。明知定有掉舉。若無囂動。便非染心。無囂動故。如善無記心。故此掉舉。必徧染心。便如善等。非染汙言。或通難前。無惛沉因。卽二法中各有兩難。一無堪任。無囂動。二非染汙位。然此與惛沉二麤行相不可並增。若一麤時。其一行細體皆具有。此難第二師。

唯六無沉掉。

若染心中無散亂者應非流蕩非染汙心。若無失念不正知者如何能起煩惱現前。

次難初師唯許五俱。若染心中無散亂者應非流蕩。如善心等既有流蕩由散亂故。此有三體。一別境定數染者名散亂違善定故。如薩婆多比諸法師皆作此說。今無此文。二無別體性。非彼定數。此復二說。一是愚癡分無明爲體。二云貪瞋癡分對法等同。五十五云忘念散亂惡慧是癡分等故。徧染心生。三別有體性。第六卷說故。念定二法別境。

爲體故亦無別體。或是癡分。若無失念不正知者。如何能起煩惱現前。必失正念及不正知。此是非故而起煩惱。由有失念不正知二法。非彼染心是正念等故。汝所言無此二。染心應是善性。自性無記心。許無此二故。如加行善等。此破初師無此三故。

故染汙心。決定皆與八隨煩惱相應而生。謂惛沉掉舉。不信。懈怠。放逸。忘念。散亂。不正知。

下顯徧隨染心。定有八隨惑俱。加第一師三。加第二師二。彼無惛掉故。除第三師二。

忘念不正知念慧爲性者。不徧染心。非諸染心皆緣會受有簡擇故。若以無明爲自性者。徧染心起。由前說故。

爲簡別境亦是徧染。故言忘念等忘念不正知。若卽別境念慧爲性。不徧染心。論又言徧者依無明分說。所以者何。破第二師以彼唯執是彼數故。非諸染心皆緣會受。破彼念數。且如邪見撥無滅諦。此豈會受。彼若言是先聞名。故方撥無者。豈撥名耶。今邪見撥體。體未曾受故。非諸染心皆有簡擇。簡前師說有不正知是慧分故。此二若以無明爲

體可徧染心。其五徧中亦可約此別境爲體者。以不徧故不說有之。六中但約無明爲體徧故說也。問曰。此中所說何假何實。如後自解。問。如起邪慧。簡擇法時。亦有愚癡。卽便有二。不正知耶。餘忘念等爲問。亦爾。答曰。不然。說有慧分時。不說無明分。無慧分時。說有無明分。有不正知時。亦說有無明。義別說故。餘數亦爾。或總於慧無明立一。不正知。不正知是假。不可言有二。如放逸等。依四法立。不約貪等別說。二相應故。

然此意俱心所十八。謂前九法。八隨煩惱。并別境慧。

下顯識俱有十八法。謂前九法及八隨惑。以別境慧卽我見故。如初師釋。忘念等法。非別境爲性。故不取別境數。

無餘心所及論三文。準前應釋。若作是說。不違教理。無別境四及善十一。根本六種念等十二。并不定四邪欲解二及論三文不同。所以如前諸師綺互而說。依此褒貶。雖無論文。定許八徧。今以諸論上下雜有致。此推究第三總結。作如是說。不違教理。成唯識論述記卷第二十八

成唯識論述記卷第二十九

論文卷五之一

唐京兆大慈恩寺沙門窺基撰

此染汙意何受相應。

解此因位心所俱中文別有三。上第一解染俱。第二顯餘俱。此下第三解五受俱。頌中以同初能變故。所以不說。今說有異。是故說之。於中有二。初問後答。此初問也。此下諸說非必別師預設異計。後申正義。

有義此俱唯有喜受。恆內執我生喜愛故。我既欣行。故唯喜俱。

有義不然。應許喜受乃至有頂。違聖言故。

應許喜受通於三界九地繫故。此破前師。以此識受一類而轉。故此應通。違聖言故者。違瑜伽第十二說。初定出憂。第二定出苦。第三定出喜。第四定出樂。於無想中出捨根。乃至廣說。若許喜樂通在有頂。應許憂苦通三界有。

應說此意。四受相應。謂生惡趣憂受相應。緣不善業所引果故。生人欲天。初二靜慮喜受相應。緣有喜地善業果故。第三靜慮樂受相應。緣有樂地善業果故。第四靜慮乃至有頂捨受相應。緣唯捨地善業果故。

許此意與四受相應唯除苦根唯五識故餘文可
解。此師意說第七所緣阿賴耶識是引業果隨在
彼善惡地。此第七識卽與彼地能引果業之增上
受類相應緣彼業果爲境界故。又地所有增上之
受。此地之業隨是何受緣彼地業果。故見隨彼增
上與彼受俱。欲界雖有捨受之果此識應與捨受
相應而業劣故。此不說俱。如苦樂受唯在五識非
引業俱。故今不說。初二定樂怡悅五根義別說故
亦不說之。準可知也。

有義彼說亦不應理。此無始來任運一類緣內執我。

恆無轉易。與變異受不相應故。

第三師言第二師說亦不應理。此無始來一由任運故。恆二由一類故。無變故。唯捨受。非是捨受。可名變異。有易脫故。瑜伽六十三。證俱生捨受。第八識俱。非可起餘憂喜等受。亦證此義。然樂憂等皆思惟引發。此識任運。如何不起捨。

又此末那與前藏識義有異者。皆別說之。若四受俱亦應別說。既不別說。定與彼同。故此相應唯有捨受。謂此本頌說此末那與第八識義有異者。皆別說之。此若與彼四受相應。頌應別說。如依緣等。既本

頌中略不別說。此與受俱。故知同彼。唯有捨受問。異熟一切種等。既有不同。何故此識而不別說答。彼是第八自相別義。此中亦解識之自性。又言染汙顯卽異彼。故不別說。觸等五同。何故今說。何不須說多少異故。謂加愛等。恆轉如流。何故不說。此三位捨卽顯非恆。如流轉故。又如樞要解。又此若與四受相應。則金剛心非頓斷過。由前位中少分斷故。問。若爾。如欲界中不伏之修惑。與此何別。答。彼前前地已永離故。此合於後方永離故。

未轉依位。與前所說心所相應。已轉依位。唯二十一

心所俱起。謂徧行別境各五善十一。如第八識已轉依位。唯捨受俱。任運轉故。恆於所緣平等轉故。

自下第二顯因果位相應多少。若在因位。同前諸師所說多少。此第七識已轉依位。與二十一心所俱生。如第八識已轉依位。說亦如彼。唯捨受俱。任運而轉。會不易脫。不分別生。六識可然。雖初地以去。有行不行。成佛已去。無不行時。據此義。故亦名無動搖。故唯捨受。又復此智多起平等。平等卽大悲等佛位多勝功德相應。在第四禪。故唯捨受。又設下地有平等智。不變異故。如在因位。唯捨受俱。

若在十地隨第六識所引何地乃至有頂皆有此智依彼地心法空智引入滅定時彼地有故不可定說下地第七爲有頂依雖通諸地皆唯捨受此義應思不可以因數難彼心所法未必皆似故恆於所緣平等轉故唯捨受俱諸善心所法爾作用有二十一心所俱起

△次下第六依其本頌以釋性俱

末那心所何性所攝

此爲問起此識及心所何性所攝下答有二初依頌答因位後總解果位

有覆無記所攝。非餘。

此舉頌答。

此意相應四煩惱等。是染法故。障礙聖道。隱蔽自心。說名有覆。非善不善。故名無記。

今以相應顯心是染。性非染故。初釋有覆名。如第八識中解。梵云昵佛栗多。此云有覆。言隱沒者。不善言故。餘文可知。

如上二界諸煩惱等。定力攝藏。是無記攝。此俱染法。所依細故。任運轉故。亦無記攝。

上界定力。惑成有覆。問。上界煩惱。由定力故。可名

有覆此識何爲名爲無記。此識相應四煩惱等雖無定力。以所依識行微細故。任運轉故。不障善故。徧三性故。亦無記攝。非如見道欲界一切分別生惑。及修道麤能發惡行者。皆是不善。此微細言。攝論二本皆第一說。此中兩解。一云。前問及頌答。總問答心及心所法。今此解中。以心性非染。舉相應染。以顯心體。以心體細顯。此俱惑是有覆性。俱染障聖。唯惑覆心。名爲有覆。心不自覆。但依相應亦障聖道。故名有覆。二云。或由解中唯解心所。準前問頌。皆唯問答心所。不問末那。以俱染法。說爲不

共無明等故。恐是不善。故唯問心所。以顯心王亦有覆相。

若已轉依。唯是善性。

上依本頌解。因有覆。今顯果位。唯是善性。以順理故。以寂靜故。

△次第七段第九繫界別門。於中有二。初辨染。次明淨。染中有二。初問。次答。

末那心所何地繫耶。

此爲問已。

隨彼所生。彼地所繫。

答中有二。此舉頌答。後釋頌答。此初也。

謂生欲界現行末那相應心所。卽欲界繫。乃至有頂。應知亦然。

下釋頌答中有二。初且總解。後別顯之。此初也。乃至有頂九地皆然。卽彼地繫。若第八識生彼欲界。乃至有頂。現染末那相應心所。卽欲界繫。餘地亦爾。與六十三等同。然顯揚十九約界爲論。無地分別。何以爾者。

任運恆緣自地藏識執爲內我。非他地故。

此識恆執自地藏識爲內我故。我見唯緣自地而

起不見世間俱生別緣他地法爲我等故。對法第六他界緣云。不見世間緣他地法計爲我故。我見隨境自地所繫。他地諸法非我境故。此依俱生別緣我見行相說。由此故知第七不緣本識種子。種子許通他地法故。亦不緣色等。色等亦通故。第八異熟心通緣自他地。不作自他解。第七作我解。故不緣他地。若爾。命終心緣。何以爲我緣。未來生卽是緣自地所生處故。此別緣我。故唯自地。若總緣我。許之緣他。如下自解。卽是正義。第七唯緣第八識家。此文總已下別解。

若起彼地異熟藏識現在前者名生彼地染汙末那緣彼執我卽繫屬彼名彼所繫

若起彼地藏識現行除於種子名生彼地爲簡種子故論說言異熟藏識因中染汙第七末那緣彼執我繫屬第八名彼所繫八非能繫七非所繫相從名繫不可難以相應所緣二縛名繫相從相屬是此繫義第八是所屬第七爲能屬卽是以彼所緣爲所屬第七屬彼也如王爲所屬臣等爲能屬隨王繫國

或爲彼地諸煩惱等之所繫縛名彼所繫

此第二解。此識俱惑隨生處。是何地卽此地。攝此第七意爲自俱時四惑所繫。名彼所繫。識是所繫。煩惱能繫也。何名所生。爲第八識所生之地。煩惱繫縛名彼所繫。又解。此文三釋。一云。謂生欲界乃至應知亦爾以來。此中意說。若生欲界之現行末那。其相應心所隨彼心王卽欲界繫。繫是屬義。如臣屬王。任運恆緣。乃至名彼所繫以來。此中意說。以能緣心屬彼所緣之地。所繫相從名繫。如牛屬牯。任運恆緣。至非他地。故以來。釋能緣心屬所緣義。下方正解。先顯所由。後解屬故。或爲彼地。乃至

名彼所繫以來。此中意說。心王屬彼。隨第八識所生之地。煩惱所繫。以王屬臣。屬相應縛。雖有此義。前解爲勝。

若已轉依。卽非所繫。

此在因中。初地已去。已轉依位。有非所繫。是無漏。故前所繫言。亦通法執。是彼類故。

△自下第八段。依第十門起滅分位。

此染汙意。無始相續。何位永斷。或暫斷耶。

於中初問。後答。因欲舉頌。故先徵起。

阿羅漢滅定。出世道無有。

此下隨答文中有二。一正解本文伏斷分位。二傍乘義解行相分位。初中有二。初舉頌答。後廣諍答。初中有二。初舉頌。後別釋。此卽初也。卽與對法第二等同。六十三中唯有二位。一無學。二有學。無滅定者。非是相違。彼說滅定二位中起。故亦攝盡。又彼說世道伏與不伏。因言出世道。故不舉滅定。滅定非道故。亦非有學。非無學故。又彼唯依人。故說二位。此依人及法。故說有三位。言無有者。有永暫義。如下自解。

阿羅漢者。總顯三乘無學果位。此位染意種及現行。

俱永斷滅故說無有。

別釋之中復分爲二。初總解後別釋。此等卽初總攝三乘無學果位。如第八識斷捨之中引對法等文。然第八識唯從煩惱以立藏名。今名染汙亦通法執約自體說。此中不退菩薩卽是出世道所攝。故法執在故能染菩薩。暫捨門攝非永捨攝。在無學捨隨其所應有二種染。一染三乘。卽謂人執在無學俱不行。二謂法執不染二乘。但染菩薩。唯如來捨。此中通說故言染意。現種永滅非唯人執。問人執染二乘所執藏識。二乘可名捨。法執染菩薩

所執藏名。菩薩應不捨。答。煩惱障。藏名從立法。執既細。菩薩不從得名。又煩惱染三乘所執藏名。捨法執染菩薩不從立藏名。設有能執。不名藏識。問。通染三乘所執。可共名藏。但染菩薩所執。獨名爲藏。應設勦勞。答。藏名據縛。唯在煩惱。染體據障。亦通法執。

學位滅定出世道中俱暫伏滅。故說無有。

隨其所應三乘學位滅定出世道中暫伏滅者。卽隨何乘所障便伏。二乘初果已去。大乘初地頓悟。二乘及菩薩人空。唯伏人染。頓漸二悟菩薩法空。

亦伏法染。

謂染汙意無始時來微細一類任運而轉。諸有漏道不能伏滅。三乘聖道有伏滅義。真無我解違我執故。上總解頌阿羅漢聖道滅定三位不行。下別解三於中有二。初解滅定聖道不行。後解無學初中有三。先解聖道不行之位。此意有漏道不能伏。六十三說同。彼論云。何以故。已離欲猶行故。又解世道唯是事觀。此迷理。故世道不伏。此諸煩惱皆是本識種子所引。於一切時微細一類任運而生。非所對治及能對治境界。緣力差別轉故。八十八云。俱

生薩迦耶見世道不伏。彼約六識中語。彼緣三界法爲我所故。然不言金剛心方斷。此不同彼斷。然不伏相似。隨其所應。三乘無漏心起方伏。無分別智真無我解。違我執故。隨人法觀。並自違故。

後得無漏現在前時。是彼等流。亦違此意。

無漏後得智。隨人法觀。無分別智等流。引生一分。或全亦不現行。若二乘菩薩等入有漏。後得智卽不然。非彼等流故。以有漏法不能善達無我理故。

六十三同。

真無我解及後所得俱無漏故。名出世道。

顯出世道亦攝後得以無漏故如無分別

滅定既是聖道等流極寂靜故此亦非有

次解滅盡定滅盡定中何故不起聖道後得無漏觀之等流是彼果故猶如涅槃極寂靜故與彼相違故亦非有

由未永斷此種子故從滅盡定聖道起已此復現行乃至未滅

後顯前二滅已後生小乘人空菩薩法觀引者生及法執隨其所應亦不現行出觀後行未永斷故對法第二大論六十三顯揚十九十七等同

然此染意相應煩惱是俱生故非見所斷。是染汙故非非所斷。

解阿羅漢無所由義。非見道斷。任運生故。非分別故。然此染故非是不斷。不斷之法。並無漏故。明是修斷。於何時斷。

極微細故。所有種子與有頂地下下煩惱一時頓斷。勢力等故。金剛喻定現在前時頓斷。此種成阿羅漢。故無學位永不復起。

此識染法。三界相望。雖有九品。於其地地最下品。故第九品攝一切地者。與有頂地第九下下品俱。

時頓斷。以各自地極微細故。同障無學。一時頓斷。名勢力等。欲界所繫與彼相似。不能發業潤生等。故與彼惑同。金剛喻定現在前時。斷成無學。若有難言。既有九品。應隨彼地九品道斷。許此我見有九品故。卽在一界中麤細非一類。此識旣行。常一類故。故與下下同時頓斷。卽是一品無九品義。答此不然。若以同時斷。便言品力齊。如超二果人。亦以欲第九與非想第九煩惱同斷。力品豈齊。今解如彼。實有九品。彼由加行合爲九品。此障無學。故一時斷。但由此一類勝道方能斷彼多品之感。然

此第七自地無九品與自地六識中第九品我見相似。於金剛心時與非想第九品一時頓斷。若許麤細三界相似。便無增減。無性有情此第七識應非能熏。闕第三義故。由此應知實有九品。如斷善邪見唯第九品。仍作九品能斷善根。此亦應爾。一品之中分九品故。又解。此言勢力等者。品數同故。與有頂地下下品。或麤細同之故。一時頓斷。若爾無性有情第七應非能熏。闕增減故。此亦不然。如前第二能熏中解。無相違失。此二說中前解爲勝。若二乘人斷此染者。斷縛彼故。若菩薩斷無染亦

除問。見道除惡趣惡趣之果。第八亦言除。所緣第八既言無能緣。此識亦應斷。若以不行名爲斷。此識可除。若以斷體於彼不可爾。實理解者。彼趣果無。謂彼不善業所招者無。非彼身中一切修惑皆無。不可以此例彼。如下斷障及別抄說。

二乘無學迴趣大乘。從初發心至未成佛。雖實是菩薩。亦名阿羅漢。應義等故。不別說之。

若斷種子畢竟斷者。卽遷會無學。名不退菩薩。何故不說。同第八識初師捨義爲問。然上所明因位之中。二乘有學頓悟菩薩迴心有學菩薩同類。故

不別簡定性之中三乘無學並已明訖。唯有迴心
無學與菩薩不同。應次別說爲同何例。此一切時
與彼未迴心者等。故此雖是菩薩。仍名阿羅漢。以
應義等卽攝彼在畢竟斷位。阿羅漢中。故不別說。
如前第八識中第一師解。以上文義諸家共同。更
無異說。文勢總故。

△下明三位無義爲體爲義。餘如樞要。

此中有義末那。唯有煩惱障俱。聖教皆言三位無故。
下更諍也。安慧等云。三位體無。此識俱時。唯有人
執。無有法執。對法等說。三位無故。若此俱有法執。

應言三位有準此師計。卽成佛時無第七識。餘七識成佛。

又說四惑恆相應故。

顯揚第一說四惑俱。故無法執。不言淨位有此識。故然。今此論不依佛地無性攝論爲證義文。本經本論不言七識有淨亦通無漏故。

又說爲識雜染依故。

攝論第一論本不言爲淨依。故無淨第七。法執第七滅定聖道無學三位無第七體也。

有義彼說教理相違。出世末那經說有故。

護法等釋三位無染義非體亦無六十三云問。若彼末那於一切時思量而轉如世尊說出世末那云何違立。準此大論及此處文稱經說有準下證有此識卽是解脫經六十三中有二解。一名假不如義卽出世末那實不思量故。二遠離顛倒思量能正思量故通於淨。此違教。次違理。

無染意識如有染時定有俱生不共依故。

彼言有學出世道現前及無學位有漏無漏第六意識皆無第七依者。此等無染意定有俱生不共所依。次第逆簡第八及無間緣種子等宗也是意。

識故。如有染時意識。論闕因也。下六證中。自具作
量。故此言略。

論說藏識決定恆與一識俱轉。所謂末那意識起時
則二俱轉。所謂意識及與末那。若五識中隨起一識
則三俱轉。乃至或時頓起五識。則七俱轉。

至下當知。第五十一及解深密經當七十六。

若住滅定無第七識。爾時藏識應無識俱。便非恆定
一識俱轉。

此難前說滅定之中。二乘無法執。大乘位中無淨
第七者。論說恆與一識俱言。既非是恆。亦非是定。

此位無故。前師說云。此據多分。若不爾者。非定恆俱故。

住聖道時。若無第七。爾時藏識應一識俱。如何可言。若起意識。爾時藏識定二俱轉。

此難聖道隨法執及淨第七無者。第六意起。唯一識俱。如何可言。二識俱轉。前師若云。據多時語。顯揚論說末那恆與四煩惱相應。或翻彼相應。恃舉爲行。或平等行。故知此意通染不染。

彼第一說復如何。通翻彼相應平等行。故煩惱相應。恃舉行。故然。所引識起多少。中有無學五識起。

唯六識俱非七俱難。文意似爲有藏識之言。故不說也。無學無藏識故。

若由論說阿羅漢位無染意。故便無第七。應由論說阿羅漢位捨賴耶。故便無第八。

若由大論六十三說阿羅漢位無有意。故便無第七。則無學身應無第八。以聖說故。何愛第八而便許有。憎第七而言無。言無染意。以俱許故。

彼既不爾。此云何然。

彼第八既不唯在染位中有。爾此第七識如何言然。唯染位有。

又諸論言轉第七識得平等智。彼如餘智定有所依相應淨識。此識無者。彼智應無。非離所依有能依故。莊嚴論攝論第九轉第七得平等智。平等智定有所依識。故有第七淨也。量云平等性智定有別所依識。說轉得故。如餘三智。第七若無。卽平等智亦應非有。非離所依心有能依智故。

不可說彼依六轉識。許佛恆行。如鏡智故。

又彼若言經言平等智。非第八俱。第八俱者。名鏡智故。卽依第六。此中唯取第六識也。又六識中隨依一識之能依智者。不然。佛地經中說此智品佛

位恆行。卽汝共許。許佛恆無轉異行。如鏡智故。非六識智。六識智有轉異不恆故。又間斷名不行。此非間斷名恆行。如下第十平等智處說。

又無學位。若無第七識。彼第八識應無俱有依。然必有此依。如餘識性故。

無學無此識。第八應無依。若許八無依。違比量過。汝無學位第八必有現行俱有依。是識性故。如餘七識。彼師許第七以第八爲依故。

又如未證補特伽羅無我者。彼我執恆行。亦應未證法無我者。法我執恆行。此識若無彼依何識。

又難如凡夫等未證人空人執恆行。二乘人等未證法空法執亦應恆現前有爲例均故。若此識無法執恆行依於何識。二乘定有故。

非依第八。彼無慧故。

彼說八識皆有執故。不可說執依第八識。第八識俱無慧執。故非八俱也。

由此應信二乘聖道滅定無學。此識恆行。彼未證得法無我故。

二乘聖道及滅定位法執有故。此第七識恆行不絕。未證法空故意顯迴心頓悟人等入初地已分。

證法空有此淨智。

又諸論中以五同法證有第七爲第六依。

瑜伽第五十一。攝論第一證七識中以五識爲同法。證有第七爲第六依。

聖道起時及無學位。若無第七爲第六依。所立宗因便俱有失。

若聖道起在有學及無學。無第七爲第六依。彼二論所立之宗。因應俱有過。謂若總言第六意識必有俱生不共。增上別依。卽違自宗一分宗過。自許聖道及無學意無所依故。若言除聖道及無學意識。

餘意識必有此依。卽有比量相違之過。此一分意識無依。與餘令有依者爲比量故。若以六識攝故爲因。成前總宗。此因卽有自不定過。爲如五識六識攝故意識有依。爲如汝聖道無學意識六識攝故意識無依。若以六識攝故之因。成後宗者。便有自法自相相違。決定相違過失。謂彼一分意定無依。六識攝故。如汝聖道無學意識故無第七攝論大論比量宗因皆有此失。善因明者應乃知之。或應五識亦有無依。五恆有依。六亦應爾。

義雖不然。汝之五識亦應許有無依之時。六識攝

故如汝意識此有自宗相違過失以就他宗然成返難五識恆有依意識應亦爾結成前難

是故定有無染汙意於上三位恆起現前言彼無有者依染意說如說四位無阿賴耶非無第八此亦應爾

故無染意於上三位亦恆現前二乘三位法執無染菩薩三位或淨無漏無染心起是隨所應思之差別迴心向大其理皆然論說三位無末那者隨何乘說染汙意無非無第七識體如說四位不退菩薩等無阿賴耶非無第八識體捨染名故故人

執俱定有法執。下自更解無漏亦有淨第七識。一
一皆如佛地論說及樞要說諸門分別。如第十解。
下唯正義。

此意差別略有三種。

上來依頌第十門中已略分別伏斷位訖。自下第
二因乘義解分位行相。於中有三。初標分位行相
差別之數。次列其名。後隨別釋。此卽初也。

一補特伽羅我見相應。二法我見相應。三平等性智
相應。

卽列名也。以相應法顯識行相。

初通一切異生相續。二乘有學七地以前一類菩薩有漏心位。

由此三種短長不同。故成位別。自下別釋有二。初別解三位。後重料簡。此是第一與人我見相應。正云補特伽羅通五趣攝。非唯人故。如前已解。卽一切異生全。二乘有學有漏心位起此見故。除八地已去。彼永不起此人我見。七地已前一類菩薩有漏心位。一類之言。謂卽簡取頓悟菩薩初地至七地。漸悟菩薩二乘有學從初發心初二阿僧祇劫。除二乘無學迴心菩薩者。故言一類。彼已永無故。

此菩薩及二乘有學起有漏心時者。但起無漏人執必無故。

彼緣阿賴耶識起補特伽羅我見。

此識緣阿賴耶識起數取趣見也。七地已前第八未捨阿賴耶名故也。第七非不與法見俱。法見位長。人我位短。又人我麤。法我細故。故偏說之。此爲初無此卽捨名問。能緣人我七地以前有漏心時。方言有者。此意是入無漏時捨。如下亦然。捨此相應。何故第八捨阿賴耶名。不言七地以前起無漏心時捨。答。八據永捨以性未能離他執故。七據暫

捨以染汙體少時無故不相違也。不可說彼得互捨也。以二乘有學未名捨故。若許暫捨。二乘有學入無漏心亦應名捨染汙。末那違無漏故。

次通一切異生聲聞獨覺相續。一切菩薩法空智果不現前位。

卽是第二法見相應。此若初位必有此位。有此位時未必有初。此位長也。卽諸異生一切二乘不問有學無學身全。一切菩薩卽兼頓悟及學無學漸悟菩薩十地之中法智及果不現前位。法空智者謂無分別智入法空觀時果者卽是此正智果。謂

法空後得智及依法空後得智入滅定位無分別智所引起故名法空智果此時第七識必起平等智第六法空心細第七法執障彼法空智法空智起故平等智生等流亦爾體類同故然此中言簡取人空無分別智及人空後得智并此人空所引滅定此位之時雖滅人執法執仍在人空觀麤法執行細不障彼智唯第七人執可障彼智故入人觀位人執不行如來地時此識無漏故不說也彼緣異熟識起法我見

此法執心緣異熟識起法我見法我見位既長異

熟之心亦爾。見相相當故說緣也。非人執心不緣異熟。異熟位長故不說彼。非法執心不緣賴耶。賴耶短故不說之也。

後通一切如來相續。菩薩見道及修道中法空智果現在前位。

卽平等智相應心也。從勝全論卽一切如來全無有漏故。一切菩薩見道全通頓漸悟。一切菩薩必法空觀入見道故。此非三心真見道義。及一切菩薩修道位中法空智及果現在前位。皆起平等智故。人觀不然。如前已說。然果中有遠果有近果如

何等者。佛地論說。後得智若是法觀等流者。卽是法觀。若定爾者。八地已去。不出無漏觀。彼位何時非法觀果。由此應說鄰近果者。如佛地論說法觀後得現前。若遠果者。卽人觀後得現前。或八地以去。無分別智。自入人觀。彼果起。人觀後得智。亦無妨。然此中據初解鄰近果說。若約後義。卽果全論。又此果有緣慮。不緣慮者。卽滅定。緣慮者可知。

彼緣無垢異熟識等起平等性智。

此第三智緣何法境。於佛地時緣無垢識等。卽緣

無垢第八淨識一切有爲及眞如故言等菩薩見
修道位緣異熟識及眞如故問若許菩薩亦緣眞
如卽第七識一心之中雙緣眞俗有漏無漏二境
界失答若在眞見道及一切緣眞如無分別智此
第七識一向緣如不緣第八唯理觀故其相見道
及修道中後得智品平等性智或唯緣第八或亦
緣似眞如其實唯有爲通緣有漏無漏爲境由第
六識引生別故今此總言緣異熟等等眞如等故
以後得智不親緣眞如不名眞俗雙行至五地中
方合此難合合令相應故亦無妨又解若在佛果

此平等智雙緣眞俗。若在十地唯緣異熟。未能緣如。無如前失。此亦不然。十平等中許緣眞如。佛地論中第五卷說初地卽得。故知因中亦緣眞俗。前解爲勝。或第八未捨名。得言緣賴耶。性未離故。故復言等。卽是識字及一等字。通在無垢及異熟識。此解難知。旣無能藏。藏義應暫捨。問。二執俱起。何故分位前後不同。初廣前人執。

補特伽羅我見起位。彼法我見亦必現前。我執必依法執而起。如夜迷机等。方謂人等故。

自下第二重明前位。文有其二。唯廣初二故。廣初

有二。初明二執寬狹。後明用體同別。此初也。今顯初位必帶後位。以初短故。人我位必有法我。人我必依法我起故。人我是主宰作者等用故。法我有自性勝用等故。卽法我通人我狹也。如人要迷机。不知見机。等方執爲人。迷机爲先後。方人起。此中喻。況理有淺深。淺喻謂人是人執。迷机是法執。深喻。卽迷机是迷法空。謂人是起人執。法中據迷理。人中起事執。問。人中亦可言迷理。法中起事執。答。不然。人狹法寬。以法爲本故。難淺喻云。若執是机。卽執人。可使執机是法執。旣言迷机起於人。迷机

應非是法執。答不然。迷者不了。不了机時。似於法執。非謂執是實机。方爲不了。問。若不了机。與疑問。別答。彼猶豫故。此決定故。決定迷机。遂執是人。故是法執。問。如何二執得俱起耶。

我法二見。用雖有別。而不相違。同依一慧。如眼識等體。雖是一。而有了別青等多用。不相違故。此亦應然。下顯體用同別。我法用別。慧體是一。同一種生。無違於理。如一眼識緣青黃兩境。二行相生。然今此中以兩境兩行。共許識喻。不共執心。然今所執。非是二境。無一心中於二境起二行執。故問。若爾。前

言疑於理印於事豈非二行境耶。彼雖非執行相別故。執則不然。以推求故。以堅著故。境行別者亦不俱起。今此不違故。許俱起。卽是廣前初人執位。此下廣前法執位中有三。初總廣一切唯法執位。次更重諍八地以上。後解法執不染義。

二乘有學聖道滅定現在前時。頓悟菩薩於修道位有學漸悟生空智果現在前時。皆唯起法執。我執已伏故。

廣前第二法執位也。此執寬故。初位必有此法執。故更不須釋。一切異生理無疑滯。具有人執。定性

二乘有學起聖道住滅定二位現在前時通見修道除此亦有人執頓悟菩薩除見道全此依一心真見道說一向法觀違法執故若三心觀卽初念時唯人觀故於修道位生空智及此果果卽人空後得智及人空所引滅定也有學漸悟菩薩一位中生空智及二果現在前時卽皆唯起此識法執以此人執障人空智故定性二乘聖道滅定頓漸菩薩生空智及果位我執已伏至金剛心方能斷故唯有法執頓漸菩薩皆除見道法空智及果者必無法執故然唯起法執中定性二乘無學及

此漸悟如何。

二乘無學及此漸悟法空智果不現前時亦唯起法執我執已斷故。

明此二種人也。謂此定性二乘無學全及此漸悟菩薩一切位中法空智及果不現前時若住散定心有漏無漏心皆唯起法執我執已斷故漸悟卽除見道全及修道中法空智及果現在前位此位法執定不行故餘位非所除皆有法執也。然此一切若是漸悟有學無學頓悟菩薩八地已去大勢相似七地已前有漏心間不同八地自下第二故

重諍之。

八地以上一切菩薩所有我執皆永不行。或已永斷。或永伏故。法空智果不現前時。猶起法執。不相違故。重諍八地已上三地。彼位人我執皆永不行。不行有二。無學漸悟。彼已永斷。名爲不行。有學漸悟。及頓悟菩薩。此位永伏。名爲不行。卽是第八捨其名也。能緣不行故。此三地法空智不現前。起人觀時。猶起法執。不相違故。細執不障麤觀起故。若不然者。卽應起法觀。唯無漏相續。無有漏心隔。以此爲證。八地已去。若彼許起第六意識有漏心者。何故

人執彼位不行。人執不障有漏心故。設未永斷。彼人執種。但是永伏。故知無漏心常起。人法觀此。以何爲證。如解深密經當七十八二障三處過也。如契經說。八地以上一切煩惱不復現行。唯有所依所知障在。

八地已上。一切煩惱不復現行。唯有所依所知障在此經文也。

此所知障是現非種。不爾煩惱亦應在故。

八地已去。所有法執是現行非種子。此非第六識中法執現種說。彼地地皆能斷故。若謂彼說第七

惑餘識中法執種子非有現行。現行所知障。此位
 無故者。卽煩惱種子亦應言在。十地之中未斷第
 七及餘修道煩惱種故。應言此位煩惱所知二障
 俱在。何故唯言所知障在。若言第六識可起現行
 法執。故言法爲依者。此與何法爲所依也。第六非
 所依。第七是所依。又若許第六起此染心。何故不
 起煩惱人執。何法爲障令不生耶。不見餘時第六
 意識唯有法執。經於一切時都無人執故。然上重
 諍初及第二位。不言平等性位者。彼易了故。自下
 第三重解法執。染不染義。問。何故上言二乘異生

全言有也。

法執俱意。於二乘等雖名不染。於諸菩薩亦名爲染。障彼智故。由此亦名有覆無記。於二乘等說名無覆。不障彼智故。

於二乘等等諸異生。雖名不染。於菩薩名爲染。障菩薩智故。由此法執通二無記。望二乘是無覆。望菩薩亦名有覆。無記不障二乘故。

是異熟生攝。從異熟識恆時生故。名異熟生。非異熟果。此名通故。

有四無記。此何無記攝。是異熟生攝。從異熟識性

恆時生故名異熟生。非是從善惡異熟業所生。名異熟生。異熟生無記名通。故攝此。

如增上緣。餘不攝者。皆入此攝。

三緣不攝。皆此緣攝。三無記不攝。皆此無記攝。何者。非異熟生耶。餘三雖亦從異熟生。然有別名。此不在彼別名中。故是總名攝。然卽別名非餘三故。如佛地第七。及此論下二障中敘。然此第二雖是總束。上爲三位解第十門訖。

成唯識論述記卷第二十九